

企寧文牘

序

變革以來二十年中人豪踵出徒以奸蠹亦雜生橫阻進行致國運尙未隆昌輿情灰沮不以並世動受挫扼之人豪爲重迨異日昌國之勳告成始相與流連嘆慕知今日實降才未菲吾儕歷憂患較多而識時賢之志行略悉則一一心焉指信某也某也皆非後時而徒生中國現狀雖積敗振而興之之人豪頗較異世爲多顧人物亦應乎時勢而各表見其行能多半已以姓氏聞世者皆欲適於戰鬪二十年舊社會之故各成爲新舊參合之人豪其可稱爲新式人豪者獨武寧李先生奮於羣少年中而翹然爲之魁故已以闢草萊者合羣賢而成斬削具形之民國必將復以開太平者運偉力而爲盛明協軌之中華姑射先生管葛而兼左馬不惟豪於文亦且聖於識平生不輕期許乃多先生之雄偉而以先生之品德才概與其言動規畫之見於紙墨者編刊武寧文牘冀從小冊窺見先生不

掩之精神用以介紹於邦之來哲共模範於英氣新爽之間相與興國於短時以內恆大贊之然則此區區之小冊固非如舊時編刻偉人書牘徒供後世纂輯記傳者取材而已固將以一大人豪之模略製造多數人豪者也

民國五年歲暮吳敬恆序

自序

曩者余不知武寧元年冬武寧因事與袁氏相激迕毅然有派兵武穴之舉余聞而壯之意其人必負氣敢任多奇節能大有爲足以挽此頽靡不振之國俗者時袁氏氣燄包一世國人奉之若神明卽至稟桀強項如民黨領袖亦皆憎伏屏息羣以十年總統相推許武寧獨眦之蔑如時論頗非難之余獨以是重武寧遂閒行入贛因俞君永瞻得交武寧大善之而未嘗有所助益也往歲復邂逅南島相處益稔去冬遂相隨入滇佐理戎幕間因得盡窺其抱負特以所處未得回旋之地且微陽傷魯周道倭遲其所表襮蓋十不獲一今夏提兵到粵遂有擊逐龍氏之舉髦士俊客駭汗相顧毀者半譽者亦半而武寧之魄力氣概亦遂足俯瞰一世爲時流所驚識焉茲事之起原因雜揉要以吾粵人腐心毒龍妄以被征服者之

待遇奴使吾民呼族引類永享茲土且日日括取貨財經營壘穴爲私踞雄邦作梗民國之計因是環乞武寧爲粵人復其人格爲國家翦此巨慝余粵人也亦大以是堅請武寧武寧遂慨然允之昧者不察或且以是爲武寧病余獨僭武寧此舉實有大造於民國功德峨峨不可量限後有識者必能深證余言然項城一世之雄望龍居而却步內外百千諸彥談羊石而動色當是時舉世喑喑非武寧誰敢出此余故稱其魄力氣概實足儻曠一世云云茲特取其軍中文電之關係大要文辭可觀者彙攬之都六十六篇弁以小傳以介紹於世儻亦爲憂時愛國慨念英雄者之所樂於覽觀乎五年十月姑射



武 寧 小 像

八

傳

武寧小傳

英雄者時代之產兒時無英雄則國荒而民憂信乎物腐者蟲生之媒細流委瑣育風卷舒則人皆雌而不雄或雄而不聞信乎海流東泝名邦失礎孱庸百年擾攘五載良材美姿杳然莫得其朕骸體橫陳饑涎四滴嗚呼斯時何時非吾民發揚蹈厲買絲善繡時耶迴睨崑崙誰咀其英瞻拜九有孰森其靈時乎時乎請先以武寧進

武寧贛產也贛有名嶽曰廬山襟江帶湖奇氣盤薄流雲布瀉涵泌豫章之野生其間者常得高慧史蹟爛然照耀大江流域千載於茲矣武寧其近挹神光皦然以興者也竊觀史稱俊哲常樂覘其異稟武寧生而岐嶷幼而徇齊長而聰敏成而剛強童年出就外傳弦誦之頃輒英然獨眎翹翹羣兒間鄉父老絕驚異之弱冠棄科舉投武備學堂翌年考試出洋得

選由陸軍部咨送東渡入振武學校觀彼邦盛強益抱奇志知國力膨起實導源於政治組織而非徒局部的繕治軍政所能爲力每慨念宗邦革命思潮輒鬱然以起於是甚奮勉廣交遊畢業得吐血病回國就醫旋復東渡入士官學校畢業由駐日公使咨回江西當道引爲新兵營長以其神智湛深獨學專受益以積年雄抱器識豐偉如乳虎入羣爚燁傾眎管教訓練翼然獨具條貫部衆承流肅然以歡旋因事辭差走京師主馮公華甫家適李經羲奉命督滇向當道徵才士段公芝泉馮公華甫以士官生十餘人薦武寧與焉遂偕唐莫賡劉積之諸子往從之入滇任兵備處提調兼講武堂教習年餘欲投軍隊未遂而四川兵備處總辦何國鈞疊詞敦邀遂入蜀將抵成都滇督復促之回令兼代陸軍小學堂總辦適片馬問題起滇人皆激昂武寧乘幾與滇籍健者組織體育總會聘日人加藤爲管教部長青年俊士咸奔集之軍將虛揖父老謹讚不一月大發達

武風泐然響布郡邑當道頗慕之故派赴北洋參觀永平大演習辛亥八月二十抵漢口適革命軍大起欲逕渡武昌遇暴風不果翌早乘車赴京師晤諸友商大計數日復赴鄂過潯則同人方舉潯以應鄂強留武寧任參謀長輔馬毓寶治軍旅兼任司令時武漢戰事益亟清廷方起袁世凱求收挽漢族巨子亦分道走各省求颺發響應使清廷有瓦解之形武昌獲虎躍之勢斯時勝負之局實係大江流域故響應之聲首潯而次滬蘇皖動搖清廷勢力乃不復逾淮水而南各省遂益以披靡武寧抱此奇策乃在潯整集師旅發縱指使援皖援鄂推播風雲旋親率海軍赴攻南京過安慶應皖民之請入城維持秩序胡安泰等列陣西關外武寧單騎往晤要之入皖事粗定而武昌告警電日六至復親率勁旅往援晤黎公於洪山領任第二軍總司令渡楊邏與杜錫鈞所統之第一軍王芝祥所統之第三軍相策應師次黃陂和議成爲之扼腕歎息時馬毓寶已移督

全贛先是江西有洪江會者在勝清末造秘密結社風行州郡辛亥光復各地憤起其匪首皆出領軍隊不學無術妄干庶政橫斂民財羽勢流衍意氣張甚馬督故異懦失馭不獲膺懲致匪勢橫決郡邑繚然贛民疾首蹙額走要議會更賢者贛議會乃迎武寧回任贛督受事伊始卽示威稜整肅綱紀駢斬匪首居權要者數人檄收不法軍隊州郡肅然穀立以聽以其積重久弛驟受羈勒雖威伏屏息而反側異謀尙潛行不絕時流皆爲之聳懼以語武寧武寧故豪勇且善治軍不之顧唯蒐討軍實激揚士氣張國家大義以誥告之使善者自愛以圖銷弭劣者慚形以受裁廢時袁世凱方總國柄張集權說圖翦革命各都督元年秋贛人某受袁氏旨謀握贛政分武寧權不獲乃陰嗾其舊屬劉世均所部兵以叛時入夜已九時武寧聞變卽以電話傳命城內外各團營皆按兵遮要道毋許出入妄馳走者皆擊殺之不問而自率督署衛隊出討巷戰數時變兵各受

大創紛紛潰竄出城爲防兵所邏悉就擒天明全市晏然不損一塵詰朝事平卽親騎出廣場集各營大閱兵陳誥誠并撫慰之衆兵咸謹服感激流涕以是贛人皆驚武寧威勇讚仰不置然武寧固夙抱興邦奇志將以改造宗國奮起爲雄之手腕對於列祖列宗出爲肖子者區區武勇不足以盡武寧督贛後頗欲藉手有所作爲而斟酌世界國競潮流知強立之券一在政府有廣大精整之海陸軍備其每歲支出之費用須各在二萬萬金額以上一在國民間有富實優裕逾於平常生活三四倍之財產期增高國家富力至三千萬萬金額以上於臨時能供給戰費至三百萬萬以上一在國民間優秀分子其科學製作之能力足以供給國家應時之需求欲得上述之結果殊非政府片面之力所能馴至必政府與國民通力合作罄全能以負担國家之重任而爲之準備準是以求國家之進步其主要政策如約制官權發展地方自治團體以輔導民力之進步如獎

興各種社團使對於聯羣事業力圖躍進如開放政情宣達民意使政府與國民之步趨漸圖接近如普及中小學教育崇獎科學通才以增高國民神智圖建學問中心如提唱軍國主義以剛健國民精神如開放礦山保育工業建闢商場督勵交通事業以活動國民經濟增其富力如精練軍隊唱國防之先聲以改良軍實鼓舞國家主義皆宜及時興舉積極進行贛雖一隅地居中要而閩富可資使善治而獲振亦興國之選武寧以此土之良威信燿燿方意實行其抱負乃袁氏陰蓄異志大計刺謬甚武寧英銳不爲所用則陰假權柄重相齟齬武寧憤甚時國體初建正本未立憲法國會尙待期發生建國諸子義不能避此嫌怨放棄責守故正誼所在持之益堅而中央對贛陰謀猜嫉亦爲日加甚扣留槍械事起幾決裂以是武寧知袁氏之不可理喻而竊國之事之不可幸免頗欲整備武力後援國會以靜待憲法之立而袁氏陰很雄鷲計亦及此則亦欲於國

議未定之先將南方各督及黨人聲勢摧折成功其時國民心理大都怯於禍變復誤認箇人特殊勢力足以安邦定國適爲袁氏所利用遂益揮斥其勢威金錢明密布射着着勝利二年三月宋教仁被刺違法大借款隨以成立袁氏此舉實爲其勝算之表示且欲藉是以收摧折黨人之效果者也時黨論囂囂遲迴蘊釀者累月五月遂罷武寧職武寧去之滬七月段芝貴猝遣兵入潯陽贛軍大譁林虎等遂集諸將議討袁以保持贛軍武德爲擁護共和紀念議定乃星馳迎武寧回武寧許之遂入湖口搏戰盈月以缺海軍援不勝退吳城而林虎所部則屢殲北軍於德安北軍餒不得逞段芝貴乃轉挾艦隊由水道攻南昌時蘇粵已先後內潰遂偕林虎全師以退入湘託譚督散兵士去之日本是役也以國家正義未明新舊之爭過劇復以建國之役黨人虛驕失衆懽頗不爲時流所協贊袁氏因此亦復屢以矢忠共和要言中外翼獲衆信後卒以背誓食言破敗

德常汙黷世法爲國人所厭棄以身敗名裂焉則武寧之一擊爲不虛耳武寧旣之日本小住遊於歐陸歷覽諸國益歆然自虛廓然有受三年八月歐戰起旅歐同人咸怵然於國將有故議促武寧東返觀其變十月抵檳榔止焉先是袁氏當國頗自以雄武足當外侮給國人信賴其外交政策復專以厚媚遠強近拒鄰小爲計於自身之奮起憤如也其於元二年間鐵道競爭之交涉英俄法德皆各滿所欲以去而獨遺日本日人銜之無如何也戰禍猝起彼西歐強人方各謀自身之死活無暇東顧迢迢東洋遂授日人以獨霸之幾而袁氏外交之厄運殆將隨此際風雲顛播備至識者早深憂之武寧旣歸南島黨人自各地至紛紛謀蹶起要語武寧武寧謝之乃定意潛觀俟袁氏外交難局稍稍經過威信墮地良士含憤國人悲嘆之後徐圖結合起而蹴之初不意其於侘傺無憐之頃倏然稱帝以自絕於國人也十一月日人攻青島陷之四年一月遂以二十一條

件要求至武寧乃乘間詒書唐督及滇中昔年同學同事諸將帥爲語歐戰期中國家應有之大計及外交險惡諸情實復約林虎耿毅方聲濤等先後南來馳書南北諸親友之在軍者五月七日日本以絕交書至袁雖色厲內荏至是亦不能不俯首爲外交之屈服於遼魯滿蒙貽絕大極勞之禍害國人信袁者皆憤慨失望八月帝制運動起武寧遂決意潛行入滇就唐公商大計至西貢被阻復南旋十二月至香港時滇中軍帥既有成謀驍將黃毓成乃遣其姪以唐公命迎武寧遂入滇初祕居黃公家數日計定蔡公至護國軍遂起武寧被命以第二軍總司令當桂粵出長江時戰計實注川雄師皆西北行二軍止剩卒初意防守而已而武寧之雄傑則惡能忍者五年二月龍覲光督兵假桂境進屯百色其子姓復據鄉邑勾內匪遙應之勢益震時二軍組織尙未就緒武寧乃急商唐督立戰計令張開儒方聲濤分統第一第二梯團集邊境另選精卒組織一混成

旅自將之以行復分請挺進軍總司令黃毓成第三軍梯團長趙鍾琦各督所部由黔境東折下趨百色拊其背夾擊之唐公喜如武寧請遂行二月末抵蒙自龍觀光已分兵犯剝隘據之進犯叡朝張開儒時在廣南馳守之搏戰七日圍稍解黃恩錫復犯廣南據龍潭而武寧已兼程往三月九日抵廣南翌日方聲濤督兵破黃軍於龍潭黃軍潰挺進軍總司令黃毓成復督勁兵裹糧馳山谷間驍忽而南十三猝沾西隆下破龍軍於百色同時張開儒破龍軍於叡朝逐之十五陳炳焜以廣西獨立龍觀光降於桂滇南之禍遂解先是武寧善滇中諸將尤懽毓成勇略亦相似初議以第二軍兵單協彼軍相攜東下至是以川事亟且蒙自邱北龍氏兵匪竄擾未靖遂遄歸武寧乃暫留廣南集兵整旅待發四月陸督岑公馳電約東出武寧亟諾之率輕騎先行五月九日抵肇慶龍濟光疊電岑公尼武寧行不獲求繞道北出許之數日張開儒至議遣師時龍意反覆慮叵